

DEPORTE

DEPORTE@AWEMAINTA.COM

Cu bista riba e plan strategico p'e siguiente ciclo Olimpico

Comite Olimpico Arubano ta conoce un directiva nobo pa 2025-2028

DIASABRA ultimo durante asamblea general di Comite Olimpico Arubano a trata varios punto di agenda manera ta stipula den e statutonan di e asociacion. Entre otro a trata e actualisacion di e statutonan di COA cu a wordo aproba door di e federacionnan miembro y a ser manda pa Comite Olimpico Internacional p'asina percura cu ta cumpli cu tur requisito na nivel internacional. Ademas di esaki, a trata e relato anual 2024, unda a presenta e relato financiero y e relato di actividad cual ta splica tur cos cu COA a experiencia aña pasa. Importante pa remarca cu e relato financiero a wordo presenta door di Zarina Trimon di BDO, cu t'e compania di contabilidad cu ta traha riba e relato financiero. Esaki tambe a haya un aprobacion unanimo di tur federacionnan miembro presente.

E ultimo punto di agenda tabat'e eleccion di directiva nobo pa COA. Manera ta custumber, cada 4 aña tin eleccion pa eligi e siguiente directiva cu lo maneha COA p'e ciclo Olimpico cu den e caso aki ta p'e ciclo 2025-2028. Previo n'e eleccion, a conoce e retiro di dos miembro di e directiva saliente, unda a mira tesorera Juelle Thode y comisario Perlishka Lockhart tuma nan despedida di COA. Ambos a aporta grandemente n'e desaroyo y progreso di COA y a gradici nan p'e aporte brinda.

Sinembargo, a presenta dos candidato nobo cu a postula nan mes pa kier forma parti di e directiva di COA. Aki a mira Marushka Lee Tromp cu lo bira miembro di e directiva como comisario y lo tin como areanan di interesa e parti di sostenibilidad (ESG) y bon gobernansa, ademas di promove e balornan Olimpico. Marushka ta Secretaria General di UNESCO Aruba, unda su tareanan ta alinea cu esnan cu lo traha riba dje na COA. E siguiente tesorero di COA lo ta Marilyn Ellis, cu ta un profesional dinamico cu hopi conocimiento y experticio den e mundo di finansa, maneho y educacion. Su perfil como profesional ta dun'e tur capacidad necesario pa por fungi como tesorero di COA y su experiencia lo brinda un perspectiva nobo p'asina por pensa riba nivel strategico n'e desaroyo a plaso largo di maneho



deportivo.

Despues cu ambos a keda unanimente eligi como miembro nobo di Directiva, a conoce e directiva di COA pa 2025-2028. E directiva aki lo tin como presidente Wanda Broeksema, Secretaria General Nicole Hoevertsz, Vice-presidente Randall Van Trigt, Tesorero Marilyn Ellis, segundo Secretario General Maarten Willems, Comisario Marushka Lee Tromp y miembro Monica Pimentel cu ta forma parti di e directiva como Presidente di e comision di atleta. COA ta yama e dos profesionalnan cu a tuma e reto aki bon bini y ta cla pa traha na bienestar di deporte na Aruba.